

**Dewan Rakyat: Stok Penimbal Beras Negara Ditingkatkan 292,00 Metrik Tan - Noh Omar**  
**Bernama**  
**10 Oktober , 2011**

KUALA LUMPUR, 10 Okt (Bernama) -- Kerajaan meningkatkan sebanyak 292,000 metrik tan stok penimbal beras negara yang mampu menampung penggunaan sekurang-kurangnya 45 hari, persidangan Dewan Rakyat diberitahu isnin.

Menteri Pertanian dan Industri Asas Tani Datuk Seri Noh Omar berkata selain itu sebanyak 200,000 metrik tan stok penimbal niaga beras dalam pasaran dan kontrak niaga jangka panjang Syarikat Padi dan Beras Nasional (Bernas) di luar negara mampu menjamin bekalan makanan dalam tempoh tiga bulan.

"Kita telahpun ada pengalaman krisis bekalan makanan pada 2008. Ekoran daripada itu kerajaan telah merancang dasar jaminan bekalan makanan negara. Walaupun dasar itu telah tamat pada 2010 tetapi untuk makanan utama seperti padi...segala apa bantuan diberi kepada petani untuk meningkatkan hasil padi kita teruskan," katanya menjawab soalan tambahan Datuk Ismail Kasim (BN-Arau) yang ingin tahu adakah stok penimbal beras di dalam negara mencukupi sekiranya negara ditimpa krisis bekalan makanan.

Noh berkata kerajaan sentiasa serius dan komited dalam memastikan bekalan makanan negara mencukupi yang mana ia merupakan objektif utama Dasar Agro Makanan Negara 2011-2020 yang telah diluluskan baru-baru ini.

Beliau berkata untuk meningkatkan pengeluaran bekalan makanan negara kementerian melaksanakan beberapa projek berimpak besar antaranya Taman Kekal Pengeluaran Makanan, Zon Industri Akuakultur, Pusat Fidlot Nasional, ladang kontrak dan pembangunan usahawan asas tani.

"Kementerian juga akan terus membangunkan sistem rantai bekalan makanan yang lebih terangkum dan kukuh dengan penglibatan kerajaan, swasta serta petani, penternak dan nelayan bagi menghubungkan pengeluaran dengan permintaan pasaran, meningkatkan aktiviti nilai ditambah serta mengurangkan risiko perniagaan," katanya.

Noh berkata bagi menggalakkan pihak swasta untuk terus melabur dalam pengeluaran makanan, insentif fiskal termasuk pelaburan semula dan baru akan diperluaskan meliputi semua aktiviti pengeluaran dan pemprosesan.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=618914>